

Акафист святому и праведному Иову Многострадальному



Кондак 1

Избранному Господем великому Ветхаго Завета праведнику, пятому от Авраама Исавовых сынов сынови, Иову Многострадальному похвальное воспоем пение: яко своими дивными добродетельми и всем своим житием учителем всей вселенней явившемуся. Ты же, праведный Иове, прими сию похвалу, с любовью тебе приносимую, согрей наша сердца желанием подражати твоим подвигом, да единодушно зовем ти:

Радуйся, Иове Многострадальный, всему миру учителю предивный.

Икос 1

Ангели Божии в день некий предсташа Господеву, хвалу Ему возносяще. С ними же и диавол

прииде. Сей последний, вопрошенный Господом об Иове, начат клеветати на праведника, яко той чтит Господа земных ради благ, имиже Бог его награди. Мы же, злую диавольскую клевету на великаго праведника с горечию воспоминающе, тако Иова восхваляем:

Радуйся, Иове, яко сам Господь наименова тя человека непорочна и благочестива.

Радуйся, от Господа вся блага земная приемый.

Радуйся, множество слуг имевый и стада своя тысящами исчитывавый.

Радуйся, Господом дарованных тебе сынов и дочерей в великом благочестии воспитавый.

Радуйся, яко о чадех своих великое попечение являл еси.

Радуйся, яко ни к чему же от земных благ сердцем не прилеплялся еси.

Радуйся, яко мудростию своею над всеми высоко стоял еси.

Радуйся, яко царь посреде храбрых был еси.

Радуйся, яко был еси благороднейший сущих от восток солнца.

Радуйся, всеславне, Божий угодниче истинный.

Радуйся, великая дела благая совершивый.

Радуйся, в терпении своем мир просветивый.

Радуйся, Иове Многострадальный, всему миру учителю предивный.

Кондак 2

Ведая веру несокрушимую и велию преданость воли Божии раба своего, даде Господь власть диаволу вся блага земная у Иова отъяти и чад его погубити. Мы же, сему особому изволению Божию дивящиеся, вопием Премудрому Богу: Аллилуиа!

Икос 2

Разумом своим злым зело обрадовася диавол, таковое изволение Божие получивый. Во един день, егда вся чада Иовля единодушно в доме старейшаго брата своего трапезою наслаждахуся, посла диавол исполнители злые воли своя, и все имущество Иовле погуби, и десятирицу чад его смерти предаде. Буря нечаянных искушений не поколеба сего дивнаго столпа, и из уст его изыдоша сицевая мудрая словеса: Наг изыдох аз от чрева матере моея, наг и отъиду тамо: Господь даде, Господь отъят: яко Господеви изволися, тако бысть. Буди Имя Господне благословено во веки! Чтуще таковую преданность воли Божии праведника, мы в похвалу Иова сице глаголем:

Радуйся, Иове, ничимже пред Господом согрешивый.

Радуйся, Многострадальне, и устнама своима безумия Богу не давай.

Радуйся, яко двери дома твоего выну отверсты бяху всякому мимошедшему.

Радуйся, яко странник вне дома твоего не оставашеся.

Радуйся, яко ты вдовича слезнаго ока не презрел еси.

Радуйся, око слепым, нога же хромым был еси.

Радуйся, яко хлеб свой николиже един вкушал, сирым же обильно давал еси.

Радуйся, яко вси немощнии, чесого требующии, вся от тебе радостно получали суть.

Радуйся, яко о всяком немощнем ты плакал еси.

Радуйся, яко видя мужа в скорбех, тяжко вздыхал еси.

Радуйся, во всякой нужде и печали скорый помощниче.

Радуйся, ищущим предстательства твоего неусыпный заступниче.

Радуйся, Иове Многострадальный, всему миру учителю предивный.

Кондак 3

На силу свою полагаяся, сатана паки клеветчет на Иова и Богу глаголет: Посли руку Твою и коснися костью его и плоти его, аще не в лице Тя благословит? И паки Господь предает дивнаго Иова в руке беззаконника. Сеятель же зла, вышед от лица Господня, злорадно порази Иова гноем лютым от ногу даже до главы его. И седяше праведник вне града на гноищи, взял чрепок, да острогает гной свой. Мы же, благословяще Бога, допустивша навести проказу лютую на Иова непорочнаго, прославления ради раба Своего, вопием Господу: Аллилуиа!

Икос 3

Воистинну терпение паче человеческого имяше Многострадальный Иов. Болезнь в прокаженном телеси умножашеся. Жена же праведника, зрящи страдания мужа своего и сатаною научаема, даде совет Иову: Рцы глагол некий ко Господу и умри. Он же, воззрев, рече к ней: Вскую яко единая от безумных жен возглаголала еси? Аще благая прияхом руки Господни, злых ли не стерпим? Во всех сих приключившихся ему, ничимже согреши Иов устнама пред Богом и не даде безумия Богу. Откуда кто возможет обрести глаголы, прославляющыя праведника новолепне? Обаче мы, любовь к Иову побеждаеми, Иовлими же словесы прославляем Многострадального сие:

Радуйся, яко кости твоя нощию смятошася и жилы твоя в расслабление приидоша.

Радуйся, яко кожа твоя вельми помрачися.

Радуйся, яко и составы телесе твоего от гноя сгореша.

Радуйся, яко исполнен был еси болезнию от вечера до утра.

Радуйся, яко тело твое в гнои червей пребываше.

Радуйся, яко брашна твоя смрадом преисполнена быша.

Радуйся, яко гнушахуся тебе и востаху на тя видевший тя.

Радуйся, Иове, всеми прилоги лукаваго непреклонный.

Радуйся, и до смерти Господу преданный.

Радуйся, безумная словеса жены своея обличивый.

Радуйся, столпе добльственный, в тяжких болезнях своих никакоже унынию предавыйся.

Радуйся, в скорбех своих Бога благословивый.

Радуйся, Иове Многострадальный, всему миру учителю предивный.

Кондак 4

Множество великих смущений найде на праведника, егда приидоша к нему три друзи его. Сии издавеча на прокаженного возревше, не познаша его, и возопивше гласом велиим, восплакашася, разтерзавше ризы своя и посыпавше перстию главы своя: седяху при нем семь дний и семь ночей, и никтоже от них возгагола к нему словесе утешения. Зря таковыя друзи своя, всем сердцем устремися невинный страдалец к Богу, на Него Единого уповая и взывая Ему: Аллилуиа!

Икос 4

Слыша глас велий и вопль друзей своих, уразумел еси, Многострадальне, яко тии не дадут тебе утешения. В горести же душевной, пред лицом Господа, отверзл еси уста своя, Иове, начен глаголати, яко лучше тебе не родитися, нежели жити кроме близости к Богу. Сострадающе праведнику в неизреченном его горе, в похвалу великия его преданности Господу, глаголем Иову сицевая:

Радуйся, велий Ветхозаветный праведниче, все блаженство свое в близости к Богу полагавый.

Радуйся, страх от Бога отверженну тебе быти в низпосланных искушениях испытавый.

Радуйся, смерть предпочитавай, нежели жити тебе оставленну от Бога.

Радуйся, чаянием утешения Божия скорби своя твердо претерпевый.

Радуйся, яко о безконечной загробной жизни вещал еси.

Радуйся, яко в смерти вечный покой полагал еси.

Радуйся, скорби земныя яко предуготовление к жизни будущей разумевай.

Радуйся, вечныя радости прозорливый провидче.

Радуйся, о безсмертном блаженстве ко Господу взывавый.

Радуйся, в земных благах токмо с Господом благо видевай.

Радуйся, яко красоты зримаго неба без Бога за ничтоже почитал еси.

Радуйся, яко новаго неба и новыя земли всею душею ожидал еси.

Радуйся, Иове Многострадальный, всему миру учителю предивный.

Кондак 5

Всецелыя Господу преданности праведника три друзи его в словесех Иовлих не разумеваху, токмо же ропот его на Бога видяху: сего ради внушаху Иову к Богу обратитися с молитвою и покаянием о гресех своих. Невинный же страдалец о едином моляше Бога, да даст ему Господь силу невинных страданий своих уразумети. К Богу, источнику премудрости и разума, от сердца своего сокрушенного праведник вопияше: Аллилуиа!

Икос 5

Хотя указать на неисповедимыя пути Господни, об уразумении киих и должно есть человеку Бога умоляти, ты други своя, Иове, жити в воли Божии наставлял еси. Мы же, мудрыя речи страждущаго праведника чтуще, приносим ему сия похвалы:

Радуйся, яко неправды на Бога уста твоя не изрекоша.

Радуйся, ложь друзей своих мудро обличивый.

Радуйся, о непостижимости промысла Божия смиренномудро вещавый.

Радуйся, жизнь праведников в Ветсем Завете уяснити возжелавый.

Радуйся, погруженна себе от природы во всякую скверну видевай.

Радуйся, нужду в ходатаи между Богом и людьми своим благочестивым сердцем прозревай.

Радуйся, любви Отчи от Бога возжадавый.

Радуйся, яко слезно умолял еси Господа, да не удалит Он от тебе страх Свой.

Радуйся, яко искушения своя от Бога посланная почитал еси.

Радуйся, яко грядущую смерть избавительницу себе от земных скорбей полагал еси.

Радуйся, мудрый изъяснителю путей Божественных.

Радуйся, благий руководителю к Царствию Небесному.

Радуйся, Иове Многострадальный, всему миру учителю предивный.

Кондак 6

Проповедник непостижимости глубин Божиих, Божия премудрости и разума явился еси, Многострадальне, егда обличал еси своя лицемерствующие други, мнящия себе пути премудрости Божия разумеюща. Смиренно видя себе немощна промысл Божий ведети, возжелаше праведник на суд пред Богом стати и у Того особыя милости просити, дабы Господь грозную руку Свою отъял и страхом Своим его не ужасал. Нося в сердце своем смиренную мольбу ко Господу, со умилением Иов к Единому Судии и Богу взываше: Аллилуиа!

Икос 6

Возсия в души твоей, праведне, благодатный луч Божественный, егда в велицей горести своей приближение к смерти ожидал еси, и к невозвратному шествию в неведомую страну мрака и тьмы вечныя готовился еси. Всею бо душею любя Господа, по призыву Божию в загробный мир

ити готов был еси, Иове, обаче надежды жизни новыя в близости к Богу в сердце своем не отрывал еси. Радующеся таковому светлому чаянию страждущаго праведника, с любовью поем ему:

Радуйся, смиренный, Богомудрый, невинный страдальче.

Радуйся, о близости смертной непрестанно помышлявый.

Радуйся, день и час кончины человека в премудрой воли Божии полагавый.

Радуйся, рабе Христов нелицемерный.

Радуйся, яко чистым сердцем своим Бога узрети возжелал еси.

Радуйся, яко в своей глубокой Господу преданности дерзновенно Того вопрошал еси.

Радуйся, яко от правды своея никакоже отступил еси.

Радуйся, яко у Бога истинныя премудрости искал еси.

Радуйся, други своя врачы неправедныя именовавый.

Радуйся, в словесех их леть пред Богом видевый.

Радуйся, душу свою чисту и непорочну сохранивый.

Радуйся, безбоязненно пред Господом на суде стояти восхотевый.

Радуйся, Иове Многострадальный, всему миру учителю предивный.

Кондак 7

Хотящим истинную мудрость в словесех твоих уразумети, помози нам, угодниче Божий. Ложныя други своя обличая, указал еси им, Иове, яко блага земная и горести людския суть в руках Божиих. Господь раздает их премудро: отнюдуже и праведный люте страдает и нечестивый благоденствует. Тайны мироправления Божия человек перстный ведети не может, за вся же должен есть благодарити Господа и, восхваляя Его, пети Ему: Аллилуиа!

Икос 7

Дивныя речи слышим мы из уст Ветхозаветнаго праведника. Лицемерсвующии же друзи его утешения Иову не даваху, наипаче же новыя скорби сердцу его причиняху. Праведник же токмо ко Господу мысль свою устремляше, на Единого Заступника и Нелицепрятнаго Судию Бога уповаше, от Него Единого утешения чая. Видяще таковое превыспреннее устремление Многострадальнаго, величаем его сиче:

Радуйся, лицемерия мудрый обличителю.

Радуйся, други своя злыя утешители именовавый.

Радуйся, видевый други, покивающих главами над великими страданиями друга своего.

Радуйся, токмо от Господа сердцу своему облегчения искавый.

Радуйся, токмо на небесех Истинного Заступника себе видевай.

Радуйся, яко ужасы пред Богом преисполняешься сердце твое.

Радуйся, яко чистою молитвою своею к Богу приближался еси.

Радуйся, яко на правду свою крепко уповал еси.

Радуйся, в смирении своем, беседовати с Богом недостойна себе почитавый.

Радуйся, токмо умоляти Бога Судию своего желавый.

Радуйся, невинность свою пред всем миром свидетельствуй.

Радуйся, яко око твое благодатными слезами преисполнено бе.

Радуйся, Иове Многострадальный, всему миру учителю предивный.

Кондак 8

Странно есть нам, сыном Завета Нового, кровию Сына Божия искупленным и Евангелие Христово имущим, дерзновенная словеса Ветхозаветного праведника слышати. Великия тайны загробного мира Многострадальному не ведомы бяху, своим же преданным Богу сердцем Иов моляшеся, да озарит его Сущий на небеси Свидетель и заступник таковых таин ведением. Ко Господу слезит око Многострадального и с умилением поет праведник Богу: Аллилуиа!

Икос 8

Чая приближения кончины своея, терпя на земли страдания тяжкая, в благодатных озарениях своих глаголаше праведник, яко аще в скорбех на земли несть облегчения, да скрый его Господь в преисподних до времени. Егда же престанет гнев Божий, греси и беззакония людская покрываются, тогда Господь по милости своей даст праведнику близким к Нему быти. Мы же, таковое светлое упование страждущаго зряще, в особую ему похвалу глаголем сице:

Радуйся, прозорливче Богомудрый и просвещенный.

Радуйся, святой и великий страдальче.

Радуйся, плотию постардавый и греха свободивыйся.

Радуйся, любовью ко Господу дух уныния препобедивый.

Радуйся, яко светлыя надежды жизни будущия преисполнен был еси.

Радуйся, яко всею душею в любовь безконечную Божию веровал еси.

Радуйся, тайны загробного мира уведети возжадавый.

Радуйся, в мрачных удолиих адовых милости Божия ожидавый.

Радуйся, упование на светлую жизнь за гробом Давиду, Исаии, Иезекиилю и иным пророком равный.

Радуйся, яко сим упованием стал еси на единый путь с великими Ветхозаветными праведники.

Радуйся, всем праведником радость светлаго бытия за гробом проповедавый.

Радуйся, Евангельских Христовых истин прозорливый исповедниче.

Радуйся, Иове Многострадальный, всему миру учителю предивный.

Кондак 9

Всякими великими искушеньми и скорбьми духовно возрастал еси, Иове. Господь же особыми откровении улаждаше душу твою, Многострадальне. Благодатно озаренный Богом, ты, избранниче Божий, вещал еси: Вем, яко жив Искупитель мой, Иже в день последний распадающуюся кожу мою сию из праха воскресит, аз же во плоти моей узрю Бога. Воспринимающе сердцами нашими сию веру в воскрешение плотию, мы, таковыми откровении праведника вразумляеми, вопием Богу: Аллилуиа!

Икос 9

Ветия воистинну неправедныя явишася многоречивии друзи твои, Иове. Ложнии сии утешителие возжелаша тя, страждущаго друга своего, укоряти, глаголюще, яко ты алчущих не питал еси, нищих не одевал еси, вдовиц и сирых обижал еси, и жажду ближних не утолял еси. О, великое долготерпение великого страдальца! Восхваляюще таковое долготерпение и чистое добродетельное Иовле житие, воспеваем ему сичевая:

Радуйся, яко поношения от друзей своих смиренно претерпевал еси.

Радуйся, яко и посмеяния малых детей благодушно принимал еси.

Радуйся, яко и раби твои любовь твою к ним забыша.

Радуйся, яко и жена твоя лукавому совету неразумно внимаше.

Радуйся, яко злый сатана, разтерзав столп телесе, сокровища духа твоего не украде.

Радуйся, велий борче, вся козни вражьи препобедивый.

Радуйся, яко Единого Бога и Господа на земли зрети хотел еси.

Радуйся, яко своею преданностию Господу прославился еси.

Радуйся, высотой подвигов своих всех удививый.

Радуйся, просвещения духовнаго указателю.

Радуйся, всех людей великое утешение.

Радуйся, яко многим в мире сем тобою спасение явился.

Радуйся, Иове Многострадальный, всему миру учителю предивный.

Кондак 10

Спасения себе токмо от Господа чая, и светлую надежду на обновленную жизнь за гробом имея, Многострадальный Иов, иже праведник Ветхаго Завета быв, утвердился в озарениях своих не дерзаше, в мыслях же и чувствах своих сумняшеся и горесть некую в души

претерпеваше. Мы же, праведнику в сей горести сострадающе и Святей воли Божии преклоняющеся, возопиим Любвеобильному и Премудрому Богу: Аллилуиа!

Икос 10

Стена крепкая в преданности Господу всему миру явился еси, Многострадальне, егда твердо о непорочности своей и лицемерии друзей своих вещал еси. Имуще сердца, исполненная состраданием к невинно страждущему праведнику, едиными усты нашими со умиленном зовем ему тако:

Радуйся, великий праведниче, в страшных искушениях всецело преданность Господу сохранивый.

Радуйся, ни от когоже от людей доброго утешения видевай.

Радуйся, о лишении чад и пропавшем богатстве унынию никакоже предавайся.

Радуйся, яко всех нас побеждати искушения сребролюбия наставляеши.

Радуйся, яко изменения в небесных светилах мудро разумел еси.

Радуйся, яко ни единыя же приснопребывающия радости к мире сем видел еси.

Радуйся, токмо во Единем Бозе радость и истину выну созерцавай.

Радуйся, великая истинная откровения от Бога прияти сподобивыйся.

Радуйся, яко ложь друзей и укорения ближних крепостию духа своего превозмогал еси.

Радуйся, яко всякая безсловесная похотения чистотою сердца своего препобеждал еси.

Радуйся, во всех своих светлых упованиях никакоже посрамивыйся.

Радуйся, яко в тайны загробного мира углублялся еси веянием Духа Святаго.

Радуйся, Иове Многострадальный, всему миру учителю предивный.

Кондак 11

Пение всеумиленное воспоем Многострадальному, невиновность свою видевшему и неискупленную греховность людскую ведавшему. Зря на себе десницу Божественных воли, в промысл Божий о человеце вероваше праведный, доброго чая конца. Разделяюще несокрушимую светлую веру его и упование на Бога, могущаго тяжкую Иовлю скорбь облегчити, мы купно с ним вопием Всеблагодатному Господу: Аллилуиа!

Икос 11

Светла озарения Многострадального, светла и упования его. Времени же минувшу умолча Иов словесы. Умолчаша же и три друзи его ктому пререковати Иову, бе бо Иов праведен пред ними. Глаголет к нему новый собеседник Елиус, егоже речи благожелательней внемлет праведный. Не могущу же Иову уразумети вся словеса сия новая, се Господь Сам явися рабу Своему и глаголаше к Иову сквозе бурю и бурныя облака, обличая, и наставляя, и исцеляя его. Той же с трепетом благоговейным, внемля словесем Божиим, безмолвне множицею себе укоряше, наипаче же познаваше, яко ничтоже есть пред лицом Божиим: и абие исполнися душа

праведнича смирения благодатнаго. Видяще таковое глубокое пред Господом смирение, радостно поем Иову сицевая:

Радуйся, великий в чистоте речей своих пред Господом.

Радуйся, великий в безмернем пред Господом смирении.

Радуйся, ничтожество свое познавый, на уста же своя руку положивый.

Радуйся, подобно Аврааму, земля и пепел себе именовавый.

Радуйся, велемудре, судьбы человека в мире до Христа на себе испытавый.

Радуйся, верный слуго Господень, о своей мудрости глаголати не дерзавый.

Радуйся, ни единым же словесем о речах друзей своих обмолвивыйся.

Радуйся, яко благоговейно выслушал еси Господа о дивных делах всемогущества Божия.

Радуйся, в недомыслии пред Богом сокрушенно себе обличивый.

Радуйся, пред премудростию Единого Бога всею душею преклонивыйся.

Радуйся, в смирении своем, обличавшему тя Господу радостно внимавый.

Радуйся, всех смелых речей своих пред Господом отрекийся и в прахе и пепле раскаявыйся.

Радуйся, Иове Многострадальный, всему миру учителю предивный.

Кондак 12

Благодатная велия радость в сердце твое, Многострадальне, сниде. Ты в бури и облаце Господа своего видел еси. Ты обличающее тебе слово Господа, и гневное слово Его к неверным другом твоим слышал еси. Прокказа страшная сойде с тебе, Иове, и ты всякая блага земная в сугубом числе от Господа приял еси. В награду за скорби своя долголетие, по милости Божии, стяжал еси, и новую десятирицу чад своих радостно созерцал еси. Воскресение со всеми избранными своими Господь, тебе обетова. Презирая вся скорби своя, праведник и мы купно с ним всем сердцем радостно вопием Господу: Аллилуиа!

Икос 12

Безмерныя скорби претерпев и всецелую преданность всесвятей воли Божии показав, живой прообраз скорбей Господа, крестными страданиями диавола победившаго, явился еси, Иове. Поюще твое чудное житие, восхваляюще безмерное долготерпение твое, Многострадальне, словесы Самого Господа, Его пророков и апостолов, и церковными словесы восхваляем тебе сице:

Радуйся, праведниче, усты Божиими на всю вселенную хвалимый.

Радуйся, истину в словесех о Бозе, не якоже твои лжеречивии друзи, явивый.

Радуйся, яко Господь показа тя едина молитвенника за други своя.

Радуйся, яко грехи таковыми Господь отпусти за молитвы твоя.

Радуйся, Самем Господем не одинажды истинный раб Божий нареченный.

Радуйся, великий Ветхозаветный молитвенниче в ряду с Ноем и Даниилом.

Радуйся, яко брат Господень наименова тя образ злострадания и долготерпения.

Радуйся, яко той же апостол Иаков восхвали в твоём житии славную кончину Господню.

Радуйся, яко Церковь Христова святую книгу твою повеле прочитывати во дни страстных седмицы.

Радуйся, прообразе страстей безгрешнаго Господа.

Радуйся, яко Святой Златоуст призва нас образом страданий твоих к подражанию твоим подвигом.

Радуйся, яко в Церкви Святей имя твоё славно, досточестно и препрославлено.

Радуйся, Иове Многострадальный, всему миру учителю предивный.

Кондак 13

О, великий праведниче Ветхаго Завета, Иове Многострадальне, приими наше посильное хваление твоих безмерных во славу Бога подвигов. Твоими сильными у престола Божия молитвами подаждь помощь нам, преклоняющим колена наша пред твоими многолетними тяжкими страданиями, твердыми в искушениях и злостраданиях быти, в вечную загробную жизнь несокрушимо веровати, на получение, по милости Божии, венцев праведных на страшнем суде Христове, твердо надеяться, да и мы в обновленной плоти нашей, с тобою и со всеми святыми, сподобимся Искупителя и Господа нашего зрети и вечно ему воспевати: Аллилуиа! Аллилуиа! Аллилуиа!

(Этот кондак читается трижды, затем икос 1 и кондак 1)

Молитва 1-я праведному Иову Многострадальному

О, великий праведниче, Иове Многострадальне, чистым житием своим и святою близостию к Богу просиявший. Ты до Моисея и Христа на земли пожил еси, вся же заповеди Божия, нося их в сердце своем, исполнял еси. Явленные миру чрез Христа и Его Святых апостолов тайны, глубокими своими откровениями уразумев, причастник вечно Духа Свята быти сподобился еси. Всякия козни диавольския, в посланных тебе от Господа особых искушениях, истинным смирением своим препобедив, образ злострадания и долготерпения всей вселенной явился еси. Любовь велию к Богу и ко всем людям в безмерных своих скорбях сохранив, чистым сердцем за гробом единения с Господом радостно ожидал еси. Ныне же в селениях праведных пребываеши и Престолу Божию предстоиши. Услыши нас грешных и непотребных, пред святою иконою твоею предстоящих и усердно к ходатайству твоему прибегающих. Моли Человеколюбца Бога, да к вере крепчей, непорочней и нерушимей нас утвердит, от всякаго зла враг видимых и невидимых защитит, в скорбях и искушениях нам крепость подаст, в сердцах наших память смертную присно сохранит, в долготерпении и братолюбии укрепит, и сподобит нас на страшнем суде Христове добрый ответ дати и в воскрешенной плоти нашей Троицаго Бога созерцати и славу Ему со всеми святыми воспевати во веки веков. Аминь.

Молитва 2-я праведному Иову Многострадальному

О, святой угодниче Божий, праведне Иове! Подвигом добрым подвизався на земли, восприял еси на Небесех венец правды, егоже уготовал есть Господь всем любящим Его. Темже взирающе на святой твой образ, радуемся о преславнем скончании жительства твоего и чтим святую память твою. Ты же, предстоя Престолу Божию, приими моления наша и ко Всемилостивому Богу принеси, о еже простити нам всякое прегрешение и помощи нам стати противу кознем диавольским, да избавльшеся от скорбей, болезней, бед и напастей и всякого зла, благочестно и праведно поживем в нынешнем веце и сподобимся предстательством твоим, аще и недостойни есмы, видети благая на земли живых, славяще Единого во святых Своих славимаго Бога, Отца и Сына и Святаго Духа. Аминь.